

Tussiaatit 23

Daavip tussiaasiaa.
Naalagaq paarsisigaara, sumik
ajorsaateqanngilanga.

Uninggaartittaraanga narsani
qorsuusuni,
tasissersuuttaraanga imermut
eqqissisimanartumut.

Kingumut nakussatsittaraanga,
ingerlatittaraanga aqutaalluartut
atuartillugit
pissutigalugu aqqi.

Ingerlagaluarumaluunniit
qooqqukut toqup taartitaatigut
siooragisaqanngilanga
najoramma,
ungoorissutit ajaappissallu
tuppallersaatigakkit.

Nerriviliuupparma
akeqqama takkuanni.
Niaqora uuliamik tanippat,
ermusera ulikkaavissimavoq.

Ajunngissutsip ilumoorutsillu
malittarissavaannga
inuunera tamaat,
Naalakkallu illuani ineqassaanga
ullussanni tamani.

